

官常典



官常典第一百七十卷

勳爵部名臣列傳一

漢 張耳

按漢書本傳耳大梁人也少時及魏公子毋忌爲客嘗亡命遊外黃外黃富人女甚美庸奴其夫亡  
邸父客父客謂曰必欲求賢夫從張耳女聽爲請決嫁之女家厚奉給耳耳以故致千里客宦爲外  
黃令陳餘亦大梁人好儒術遊趙苦陘富人公乘氏以其女妻之餘年少父事耳相與爲刎頸交高  
祖爲布衣時嘗從耳遊秦滅魏購求耳千金餘五百金兩人變名姓俱之陳爲里監門吏嘗以過笞  
餘餘欲起耳攝使受笞吏去耳數之曰始吾與公言何如今見小辱而欲死一吏乎餘謝罪陳涉起  
斬至陳耳餘上謁涉涉及左右生平數聞耳餘賢見大喜陳豪傑說涉曰將軍被堅執銳帥士卒以  
誅暴秦復立楚社稷功德宜爲王陳涉問兩人兩人對曰將軍瞋目張膽出萬死不顧之計爲天下  
除殘今始至陳而王之視天下私願將軍毋王急引兵而西遣人立六國後自爲樹黨如此野無交  
兵誅暴秦據咸陽以令諸侯則帝業成矣今獨王陳恐天下解也涉不聽遂立爲王餘復說陳王曰

大王興梁楚務在入關未及收河北也臣嘗遊趙知其豪傑願請其兵略趙地於是陳王許之以所善陳人武臣爲將軍耳餘爲左右校尉與卒三千人從白馬渡河至諸縣說其豪傑曰秦爲亂政虐刑殘滅天下北爲長城之役南有五領之戍外內騷動百姓罷敝頭會箕歛以供軍費財匱力盡重以苛法使天下父子不相聊今陳王奮臂爲天下倡始莫不響應家自爲怒各報其怨縣殺其令丞郡殺其守尉今以張大楚王陳使吳廣周文將卒百萬西擊秦於此時而不成封侯之業者非人豪也夫因天下之力而攻無道之君報父兄之怨而成割地之業此一時也豪傑皆然其言迺行收兵得數萬人號武信君下趙十餘城餘皆城守莫肯下迺引兵東北擊范陽范陽人蒯通說其令徐公降武信君又說武信君以侯印封范陽令語在通傳趙地聞之不戰下者三十餘城至邯鄲耳餘聞周章軍入關至戲卻又聞諸將爲陳王徇地多以讒毀得罪誅怨陳王不以爲將軍而以爲校尉迺說武臣曰陳王非必立六國後今將軍下趙數十城獨介居河北不王無以填之且陳王聽讒還報恐不得脫於禍願將軍毋失時武臣迺聽遂立爲趙王以餘爲大將軍耳爲丞相使人報陳王陳王大怒欲盡族武臣等家而發兵擊趙相國房君諫曰秦未亡今又誅武臣等家此生一秦也不如因

而賀之使急引兵西擊秦陳王從其計徙繫武臣等家宮中封耳子敖爲成都君使使者賀趙趣兵西入關耳餘說武臣曰王王趙非楚意特以計賀王楚已滅秦必加兵於趙願王毋西兵北徇燕代南收河內以自廣趙南據大河北有燕代楚雖勝秦必不敢制趙趙王以爲然因不西兵而使韓廣略燕李良略常山張騫略上黨韓廣至燕燕人因立廣爲燕王趙王迺與耳餘北略地燕界趙王閒出爲燕軍所得燕囚之欲與分地使者往燕輒殺之以固求地耳餘患之有廝養卒謝其舍曰吾爲二公說燕與趙王載歸舍中人皆笑曰使者往十輩皆死若何以能得王乃走燕壁燕將見之問曰知臣何欲燕將曰若欲得王耳曰君知張耳陳餘何如人也燕將曰賢人也曰其志何欲燕將曰欲得其王耳趙卒笑曰君未知兩入所欲也夫武臣張耳陳餘杖馬箠下趙數十城亦各欲南面而王夫臣之與主豈可同日道哉顧其勢初定且以長少先立武臣以持趙心今趙地已服兩人亦欲分趙而王時未可耳今君囚趙王念此兩人名爲求王實欲燕殺之此兩人分趙而王夫以一趙尙易燕況以兩賢王左提右挈而責殺王滅燕易矣燕以爲然迺歸趙王養卒爲御而歸李良已定常山還報趙王趙王復使良略太原至石邑秦兵塞井陘未能前秦將詐稱二世使使遺良書不封曰良



嘗事我得顯幸誠能反趙爲秦赦良罪貴良得書疑不信之邯鄲益請兵未至道逢趙王姊從百餘騎良望見以爲王伏謁道旁王姊醉不知其將使騎謝良良素貴起慙其從官從官有一人曰天下叛秦能者先立且趙王素出將軍下今女兒迺不爲將軍下車請追殺之良以得秦書欲反趙未決因此怒遣人追殺王姊遂襲邯鄲邯鄲不知竟殺武臣趙人多爲耳餘耳目者故得脫出收兵得數萬人客有說耳餘曰兩君羈旅而欲附趙難可獨立趙後輔以誼可就功迺求得趙歇立爲趙王居信都李良進兵擊餘餘敗良走歸章邯章邯引兵至邯鄲皆徙其民河內夷其城郭耳與趙王歇走入鉅鹿城王離圍之餘北收常山兵得數萬人軍鉅鹿北章邯軍鉅鹿南棘原築甬道屬河饒王離王離兵食多急攻鉅鹿鉅鹿城中食盡耳數使人召餘餘自度兵少不能敵秦不敢前數月耳大怒怨餘使張騫陳釋往讓餘曰始吾與公爲刎頸交今王與耳旦暮死而公擁兵數萬不肯相救胡不赴秦俱死且什有一二相全餘曰所以不俱死欲爲趙王張君報秦今俱死如以肉餒虎何益張騫陳釋曰事已急要以俱死立信安知後慮餘曰吾顧已無益迺使五千人令張騫陳釋先嘗秦軍至皆沒當是時燕齊楚聞趙急皆來救張敖亦北收代得萬餘人來皆壁餘旁項羽兵數絕章邯

甬道王離軍乏食項羽悉引兵渡河破章邯軍諸侯軍迺敢擊秦軍遂虜王離於是趙王歇張耳得出鉅鹿與餘相見責讓餘問張騫陳釋所在餘曰騫釋以必死責臣臣使將五千人先嘗秦軍皆沒耳不信以爲殺之數問餘餘怒曰不意君之望臣深也豈以臣重去將哉迺脫解印綬與耳耳不敢受餘起如廁客有說耳曰天子不取反受其咎今陳將軍與君印綬不受反天不祥急取之耳迺佩其印收其麾下餘還亦望耳不讓趨出耳遂收其兵餘獨與麾下數百人入澤中漁獵由此有隙趙王歇復居信都耳從項羽入關項羽立諸侯耳雅遊多爲人所稱項羽素亦聞耳賢迺分趙立耳爲常山王治信都信都更名襄國餘客多說項羽陳餘張耳一體有功于趙羽以餘不從入關聞其在南皮卽以南皮旁三縣封之而徙趙王歇王代耳之國餘愈怒曰耳與餘功等也今耳王餘獨侯及齊王田榮叛楚餘迺使夏說說田榮曰項羽爲天下宰不平盡王諸將善地徙故王王惡地今趙王迺居代願王假臣兵請以南皮爲扞蔽田榮欲樹黨迺遣兵從餘餘悉三縣兵襲常山王耳耳敗走曰漢王與我有故而項王彊立我我欲之楚甘公曰漢王之入關五星聚東井東井者秦分也先至必王楚雖彊後必屬漢耳走漢漢亦還定三秦方圍章邯廢丘耳謁漢王漢王厚遇之餘已敗

耳皆收趙地迎趙王於代復爲趙王趙王德餘立以爲代王餘爲趙王弱國初定留傳趙王而使夏說以相國守代漢二年東擊楚使告趙欲與俱餘曰漢殺張耳迺從於是漢求人類耳者斬其頭遣餘餘迺遣兵助漢漢敗於彭城西餘亦聞耳詐死卽背漢漢遣耳與韓信擊破趙并陘斬餘泝水上追殺趙王歇襄國四年夏立耳爲趙王五年秋耳薨諡曰景王子敖嗣立爲王

張敖

按漢書張耳傳漢五年秋張耳薨子敖嗣立爲王尙高祖長女魯元公主爲王后七年高祖從平城過趙趙王巨暮自上食體甚卑有子壻禮高祖箕踞罵詈甚慢之趙相貫高趙午年六十餘故耳客也怒曰吾王辱王也說敖曰天下豪傑並起能者先立今王事皇帝甚恭皇帝遇王無禮請爲王殺之敖醫其指出血曰君何言之誤且先王亡國賴皇帝得復國德流子孫秋毫皆帝力也願君無復出口貫高等十餘人相謂曰吾等非也吾王長者不肯德且吾等義不辱今帝辱我王故欲殺之何迺汗王爲事成歸王事敗獨身坐耳八年上從東垣過貫高等迺壁人柏人要之置厠上過欲宿心動問曰縣名爲何曰柏人柏人者迫於人不宿去九年貫高怨家知其謀告之於是上逮捕趙王諸



反者趙午等十餘人皆爭自剄貫高獨怒罵曰誰令公等爲之今王實無謀而并捕王公等死誰當白王不反者迺檻車與王詣長安高對獄曰獨吾屬爲之王不知也吏榜笞數千刺熱身無完者終不復言呂后數言張王以魯元故不宜有此上怒曰使張敖據天下豈少迺女虜廷尉以貫高辭聞上曰壯士誰知者以私問之中大夫泄公曰臣素知之此固趙國立名義不侵爲然諾者也上使泄公持節問之籛與前仰視泄公勞苦如平生歡與語問張王果有謀不高曰人情豈不各愛其父母妻子哉今吾三族皆以論死豈以王易吾親哉顧爲王實不反獨吾等爲之具道本根所以王不知狀於是泄公具以報上上迺赦趙王上賢高能自立然諾使泄公赦之告曰張王已出上多足下故赦足下高曰所以不死白張王不反耳今王已出吾責塞矣且人臣有篡弑之名豈復有面目復事上哉迺仰絕吭而死敖已出尙魯元公主如故封爲宣平侯於是上賢張王諸客皆以爲諸侯相郡守語在田叔傳及孝惠高后文景時張王客子孫皆爲二千石初孝惠時齊悼惠王獻城陽郡尊魯元公主爲太后高后元年魯元太后薨後六年宣平侯敖復薨呂太后立敖子偃爲魯王以母爲太后故也又憐其年少孤弱乃封敖前婦子二人壽爲樂昌侯侈爲信都侯高后崩大臣誅諸呂廢魯



王及二侯孝文卽位復封故魯王偃爲南宮侯薨子生嗣武帝時生有罪免國除元光中復封偃孫廣國爲睢陵侯薨子昌嗣太初中昌坐不敬免國除孝平元始二年繼絕世封敖元孫慶忌爲宣平侯食千戶

吳芮

按漢書本傳芮秦時番陽令也甚得江湖間民心號曰番君天下之初叛秦也黥布歸芮芮妻之因率越人舉兵以應諸侯沛公攻南陽迺遇芮之將梅鋗與偕攻析酈降之及項羽相王以芮率百越佐諸侯從入關故立芮爲衡山王都邾其將梅鋗功多封十萬戶爲列侯項籍死上以鋗有功從入武關故德芮徙爲長沙王都臨湘一年薨諡曰文王子成王臣嗣薨子哀王回嗣薨子共王右嗣薨子靖王羌嗣孝文後七年薨無子國除初文王芮高祖賢之制詔御史長沙王忠其定著令至孝惠高后時封芮庶子二人爲列侯傳國數世絕

世安世子延壽已歷位九卿旣嗣侯國在陳留別邑在魏郡租入歲千餘萬

延壽自以身無功德何以能久堪先人大國數上書讓減戶邑又因弟陽都侯彭祖口陳至誠天子以爲有讓迺徙封平原并一國戶如故而租稅減半薨諡曰愛侯子勃嗣

### 張勃

按漢書張湯傳湯子安世安世子廷壽廷壽子勃爲散騎諫大夫元帝初卽位詔列侯舉茂材勃舉太官獻丞陳湯湯有罪勃坐削戶二百會薨故賜諡曰繆侯後湯立功西域世以勃爲知人子臨嗣

### 杜緩

按漢書杜周傳周少子延年字幼公亦明法律昭帝初立大將軍霍光秉政以延年三公子吏材有餘補軍司空始元四年爲諫大夫左將軍上官桀父子與蓋主燕王謀爲逆亂假稻田使者燕倉知其謀以告大司農楊敞敞以語延年延年以聞桀等伏辜延年封爲建平侯延年薨諡曰敬侯子緩嗣緩少爲郎本始中以校尉從蒲類將軍擊匈奴還爲諫大夫遷上谷都尉鴈門太守父薨徵視喪事拜爲太常治諸陵縣每冬月封具獄日常去酒省食官屬稱其有恩元帝卽位穀貴民流永光中西羌反緩輒上書入錢穀以助用前後數百萬



後漢 梁統

按後漢書本傳統字仲寧安定烏氏人晉大夫梁益耳卽其先也統高祖父子都自河東遷居北地子都子橋以貲千萬徙茂陵至哀平之末歸安定統性剛毅而好法律初仕州郡更始二年召補中郎將使安集涼州拜酒泉太守會更始敗赤眉入長安統與竇融及諸郡守起兵保境謀共立帥初以位次咸共推統統固辭曰昔陳嬰不受王者以有老母也今統內有尊親又德薄能寡誠不足以當之遂共推融爲河西大將軍更以統爲武威太守爲政嚴猛威行鄰郡建武五年統等各遣使隨竇融長史劉鈞詣闕奉貢願得詣行在所詔加統爲宣德將軍八年夏光武自征隗囂統與竇融等將兵會車駕及囂敗封統爲成義侯同產兄巡從弟騰並爲關內侯拜騰酒泉典農都尉悉遣還河西十二年統與融等俱詣京師以列侯奉朝請更封高山侯拜大中大夫除四子爲郎統在朝廷數陳便宜以爲法令旣輕下姦不勝宜重刑罰以遵舊典迺上疏曰臣竊見元哀二帝輕殊死之刑以一百二十三事手殺人者減死一等自是以後著爲常準故人輕犯法吏易殺人臣聞立君之道仁義爲主仁者愛人義者政理愛人以除殘爲務政理以去亂爲心刑罰在衷無取於輕是以五帝有

流殛放殺之誅三王有大辟刻肌之法故孔子稱仁者必有勇又曰理財正辭禁民爲非曰義高祖受命誅暴平蕩天下約令定律誠得其宜文帝寬惠柔克遭世康平唯除省肉刑相坐之法它皆率由無革舊章武帝值中國隆盛財力有餘征伐遠方軍役數興豪傑犯禁姦吏弄法故重首匿之科著知從之律以破朋黨以懲隱匿宣帝聰明正直總御海內臣下奉憲無所失墜因循先典天下稱理至哀平繼體而卽位日淺聽斷尙寡丞相王嘉輕爲穿鑿虧除先帝舊約成律數年之間百有餘事或不便於理或不厭民心謹表其尤害於體者傳奏於左伏惟陛下包元履德權時撥亂功踰文武德侔高皇誠不宜因循季末衰微之軌回神明察考量得失宣詔有司詳擇其善定不易之典施無窮之法天下幸甚事下三公廷尉議者以爲隆刑峻法非明王急務施行日久豈一朝所釐統今所定不宜開可統復上言曰有司以臣今所言不可施行尋臣之所奏非曰廢刑竊謂高帝以後至平孝宣其所施行多合經傳宜比方今事驗之往古聿遵前典事無難改不勝至願願得召見若對尙書近臣口陳其要帝令尙書問狀統對曰聞聖帝明王制立刑罰故雖堯舜之盛猶誅四凶經曰天討有罪五刑五庸哉又曰爰制百姓于刑之衷孔子曰刑罰不衷則人無所厝手足衷之爲言不

輕不重之謂也春秋之誅不避親戚所以防患救亂坐安衆庶豈無仁愛之恩貴絕殘賊之路也自高祖之興至於孝宣君明臣忠謀謨深博猶因循舊章不輕改革海內稱理斷獄益少至初元建平所減刑罰百有餘條而盜賊浸多歲以萬數間者三輔從橫羣輩並起至燔燒茂陵火見未央其後隴西北地西河之賊越州度郡萬里交結攻取庫兵劫掠吏人詔書討捕連年不獲是時以天下無難百姓安平而狂狡之勢猶至於此皆刑罰不衷愚人易犯之所致也由此觀之則刑輕之作反生大患惠加奸軌而害及良善也故臣統願陛下采擇賢臣孔光師丹等議議上遂寢不報後出爲九江太守定封陵鄉侯統在郡亦有治迹吏人畏愛之卒於官子松嗣

竇融

按後漢書本傳融字周公扶風平陵人也七世祖廣國孝文皇后之弟封章武侯融高祖父宣帝時以吏二千石自常山徙焉融早孤王莽居攝中爲強弩將軍司馬東擊翟義還攻槐里以軍功封建武男女弟爲大司空王邑小妻長安中出入貴戚連結閭里豪傑以任俠爲名然事母兄養弱弟內修行義王莽末青徐賊起太師王匡請融爲助軍與共東征及漢兵起融復從王邑敗於昆陽下歸



長安漢兵長驅入關王邑薦融拜爲波水將軍賜黃金千斤引兵至新豐莽敗融以軍降更始大司馬趙萌萌以爲校尉甚重之薦融爲鉅鹿太守融見更始新立東方尙擾不欲出關而高祖父嘗爲張掖太守從祖父爲護羌校尉從弟亦爲武威太守累世在河西知其土俗獨謂兄弟曰天下安危未可知河西殷富帶河爲固張掖屬國精兵萬騎一旦緩急杜絕河津足以自守此遺種處也兄弟皆然之融於是日往守萌辭讓鉅鹿圖出河西萌爲言更始乃得爲張掖屬國都尉融大喜卽將家屬而西旣到撫結雄傑懷輯羌虜甚得其歡心河西翕然歸之是時酒泉太守梁統金城太守庫鈞張掖都尉史苞酒泉都尉竺曾燉煌都尉辛彤並州郡英俊融皆與爲厚善及更始敗融與梁統等計議曰今天下擾亂未知所歸河西斗絕在羌胡中不同心勦力則不能自守權鈞力齊復無以相率當推一人爲大將軍共全五郡觀時變動議旣定而各謙讓咸以融世任河西爲吏人所敬向乃推融行河西五郡大將軍是時武威太守馬期張掖太守任仲並孤立無黨乃共移書告示之二人卽解印綬去於是以梁統爲武威太守史苞爲張掖太守竺曾爲酒泉太守辛彤爲燉煌太守庫鈞爲金城太守融居屬國領都尉職如故置從事監察五郡河西民俗質朴而融等政亦寬和上下

相親晏然富殖修兵馬習戰射明烽燧之警羌胡犯塞融輒自將與諸郡相救皆如符要每輒自破之其後匈奴懲又稀復侵寇而保塞羌胡皆震服親附安定北地上郡流人避凶饑者歸之不絕融等遙聞光武卽位而心欲東向以河西隔遠未能自通時隗囂先稱建武年號融等從受正朔囂皆假其將軍印綬囂外順人望內懷異志使辯士張元游說河西曰更始事業已成尋復亡滅此一姓不再興之效今卽有所主便相係屬一旦拘制自令失柄後有危殆雖悔無及今豪傑競逐雌雄未決當各據其土宇與隴蜀合從高可爲六國下不失尉佗融等於是召豪傑及諸太守計議其中智者皆曰漢承堯運歷數延長今皇帝姓號見於圖書自前世博物道術之士谷子雲夏賀良等建明漢有再受命之符言之久矣故劉子駿改易名字冀應其占及莽末道士西門君惠言劉秀當爲天子遂謀立子駿事覺被殺出謂百姓觀者曰劉秀眞汝主也皆近事曩者智者所共見也除言天命且以人事論之今稱帝者數人而洛陽土地最廣甲兵最強號令最明觀符命而察人事它姓殆未能當也諸郡太守各有賓客或同或異融小心精詳遂決策東向五年夏遣長史劉鈞奉書獻馬先是帝聞河西完富地接隴蜀常欲招之以通囂述亦發使遺融書過鈞於道卽與俱還帝見鈞歡甚

禮饗畢乃遣令還賜融璽書曰制詔行河西五郡大將軍事屬國都尉勞鎮守邊五郡兵馬精強倉庫有蓄民庶殷富外則折挫羌胡內則百姓蒙福威德流聞虛心相望道路隔塞邑邑何已長史所奉書獻馬悉至深知厚意今益州有公孫子陽天水有隗將軍方蜀漢相攻權在將軍舉足左右便有輕重以此言之欲相厚豈有量哉諸事俱長史所見將軍所知王者迭興千載一會欲遂立桓文輔微國當勉卒功業欲三分鼎足連衡合從亦宜時定天下未并吾與爾絕域非相吞之國今之議者必有任囂效尉佗制七郡之計王者有分土無分民自適己事而已今以黃金二百斤賜將軍便宜輒言因授融爲涼州牧璽書旣至河西咸驚以爲天子明見萬里之外網羅張立之情融卽復遣軍上書曰臣融竊伏自惟幸得託先后末屬蒙恩爲外戚累世二千石至臣之身復備列位假歷將帥守持一隅以委質則易爲辭以納忠則易爲力書不足以深達至誠故遣劉鈞口陳肝膽自以底裏上露長無纖介而璽書盛稱蜀漢二主三分鼎足之權任囂尉佗之謀竊自痛傷臣融雖無識猶知利害之際順逆之分豈可背眞舊之主事姦僞之人廢忠貞之節爲傾覆之事棄已成之基求無冀之利此三者雖問狂夫猶知去就而臣獨何以用心謹遣同產弟友詣闕口陳區區友至高平會



囂反叛道絕馳還遣司馬席封間行通書帝復遣席封賜融友書所以慰藉之甚備融既深知帝意乃與隗囂書責讓之曰伏惟將軍國富政修士兵懷附親遇厄會之際國家不利之時守節不回承事本朝後遣伯春委身於國無疑之誠於斯有效融等所以欣服高義願從役於將軍者良爲此也而忿悁之間改節易圖君臣分爭上下接兵委成功造難就去從義爲橫謀百年累之一朝毀之豈不惜乎殆執事者貪功建謀以至於此融竊痛之當今西州地勢局迫人兵離散易以輔人難以自建計若失路不反聞道猶迷不南合子陽則北入文伯耳夫負虛交而易強禦恃遠救而輕近敵未見其利也融聞智者不危衆以舉事仁者不違義以要功今以小敵大於衆何如棄子微功於義何如且初事本朝稽首北面忠臣節也及遣伯春垂涕相送慈父恩也俄而背之謂吏士何忍而棄之謂留子何自起兵以來轉相攻擊城郭皆爲丘墟生人轉於溝壑今其存者非鋒刃之餘則流亡之孤迄今傷痍之體未愈哭泣之聲尙聞幸賴天運稍還而大將軍復重於難是使積痼不得遂瘳幼孤將復流離其爲悲痛尤足愍傷言之可爲酸鼻庸人且猶不忍況仁者乎融聞爲忠甚易得宜實難憂人太過以德取怨知且以言獲罪也區區所見唯將軍省焉囂不納融乃與五郡太守共砥厲